



REPUBLIKA E SHQIPËRISË

UNIVERSITETI I MJEKËSISË, TIRANË
SENATI AKADEMIK

**RREGULLORE
PËR
PARANDALIMIN E KONFLIKTIT TË INTERESAVE NË USHTRIMIN E
FUNKSIONEVE PUBLIKE
NË UNIVERSITETIN E MJEKËSISË, TIRANË**

Miratuar me Vendimin nr. 6 , datë 19.01.2022, të Senatit Akademik
të Universitetit të Mjekësisë, Tiranë

Tiranë, 2022

KREU I
RREGULLA TË PËRGJITHSHME

Neni 1
Baza ligjore

Rregullorja për parandalimin e konfliktit të interesave në Universitetin e Mjekësisë, Tiranë, bazohet në ligjin nr. 9367, datë 07.04.2005 "*Për parandalimin e konfliktit të interesave në ushtrimin e funksioneve publike*", i ndryshuar, si dhe në ligjin nr. 9049, datë 10.04.2003 "*Për deklarimin dhe kontrollin e pasurive, të detyrimeve financiare të të zgjedhurve dhe të disa nëpunësve publikë*", i ndryshuar, si dhe aktet nënligjore përkatëse të miratuara në bazë të tyre.

Neni 2
Qëllimi

Qëllimi i kësaj rregulloreje është deklarimi dhe mbajtja e përgjegjësive për deklarimin dhe kontrollin e pasurive, garantimi i një vendimmarrjeje të paanshme, transparente, në interesin më të mirë të mundshëm të publikut nga zyrtarët publikë të Universitetit të Mjekësisë, Tiranë, si dhe ushtrimi i funksioneve nga punonjësit e Universitetit të Mjekësisë, Tiranë, jo në kushtet e konfliktit të interesave.

Neni 3
Objekti

Objekti i kësaj rregulloreje është përcaktimi i rregullave, mjeteve, mënyrave, procedurave, përgjegjësive dhe kompetencave për zbatimin e detyrimeve ligjore për deklarimet e pasurive, si dhe identifikimin, deklarimin, regjistrimin, trajtimin, zgjidhjen dhe dënimin e rasteve të konfliktit të interesave.

Neni 4
Përkufizime

1. "*Zyrtar*" është çdo person, që kryen detyra dhe ushtron funksione publike në Universitetin e Mjekësisë, Tiranë.
2. "*Person i lidhur me një zyrtar*" të Universitetit të Mjekësisë, Tiranë është çdo person fizik ose juridik, i cili rezulton të ketë pasur ose të ketë lidhje interesi, pasurore ose vetjake jopasurore me zyrtarin, sipas përcaktimit të pikës 11, të nenit 3, të ligjit nr. 9367, datë 07.04.2005, i ndryshuar, në lidhje me nenin 5 të po këtij ligji.
3. "*Parim i proporcionalitetit*" është raporti ndërmjet rëndësisë së detyrave, përgjegjësive dhe kompetencave të një zyrtari të Universitetit të Mjekësisë, Tiranë, me masat për parandalimin e konfliktit të interesave, raport në të cilin sa më të rëndësishme të jenë detyrat, përgjegjësitë dhe/ose kompetencat e tij, aq më të shumta janë kufizimet e interesave vetjakë.

Neni 5
Fusha e zbatimit

1. Kjo rregullore përcakton norma të detyrueshme për t'u zbatuar nga çdo zyrtar i UMT-së, sipas kuptimit të këtij termi në pikën 1 dhe 2 të nenit 4 të kësaj rregulloreje, kur ai merr pjesë në



një vendimarrje për akte e kontrata administrative, si dhe akte normative, konkretisht nga:

- rektori;
 - zëvendësrektorët;
 - administratori i UMT-së;
 - drejtorët e drejtorive;
 - përgjegjësit e sektorëve;
 - specialistët;
 - drejtuesit e njësive kryesore;
 - administratorët e njësive kryesore;
 - personeli akademik;
 - personeli administrativ;
 - personeli ndihmësakademik me karakter akademik;
 - personeli ndihmësakademik me karakter administrativ;
 - personeli mbështetës;
 - personat e lidhur në masën dhe mënyrën e përcaktuar në ligjin nr. 9367, datë 07.04.2005, dhe në nenin 37 të Kodit të Procedurave Administrative, sipas situatave të konflikteve të interesit që paraqiten.
2. Dispozitat e kësaj rregulloreje janë të detyrueshme për t'u zbatuar nga:
- a) çdo zyrtar i Universitetit të Mjekësisë, Tiranë, që ndodhet në pozicione, ka përgjegjësi, kryen detyra ose ushtron kompetenca të llojeve konkrete, të përcaktuara shprehimisht në ligjin nr.9367, datë 07.04.2005, i ndryshuar, si dhe në ligjin nr.9049, datë 10.04.2003, i ndryshuar;
 - b) çdo zyrtar i Universitetit të Mjekësisë, Tiranë, kur ai merr pjesë në një vendimarrje për akte dhe kontrata administrative;
 - c) çdo zyrtar i Universitetit të Mjekësisë, Tiranë, kur ai merr pjesë në një vendimarrje për kontrata, që krijojnë marrëdhënie juridiko-civile.

Neni 6

Vendimarrja dhe çastet paraprake të vendimarrjes

1. Për qëllimet e kësaj rregulloreje, në përputhje me Udhëzimin e ILDKPKI-së nr. 239, datë 02.02.2006, "*Për kuptimin e çasteve paraprake dhe thelbësore në një vendimarrje*":
- a) vendimarrje për një akt do të vlerësohet, në çdo rast, çasti i fundit i procesit vendimarrës, gjatë të cilit vendoset përmbajtja përfundimtare e aktit;
 - b) vendimarrje për një akt do të vlerësohen edhe ato çaste paraprake të vendimarrjes, sipas shkronjës "a" të kësaj pike, të cilat janë thelbësisht të rëndësishme dhe përcaktuese për përmbajtjen përfundimtare të aktit, që përfshijnë, por nuk janë të kufizuara, si më poshtë:
 - i) hartimin e projektaktit nga zyrtari ose zyrtarët dhe dorëzimin organit apo zyrtarit kompetent për vendimarrje;
 - ii) dhënien e komenteve, mendimeve, sugjerimeve dhe çdo kontributi tjetër të dokumentuar, për këtë projektakt nga zyrtarë të tjerë, brenda apo jashtë institucionit;
 - iii) dhënien e komenteve, mendimeve, sugjerimeve e çdo kontributi tjetër të dokumentuar, nga çdo zyrtar si pasojë e kërkesave, pretendimeve apo informacioneve të subjekteve të interesuara për këtë projektakt;
 - iv) dhënien e komenteve, mendimeve, sugjerimeve e çdo kontributi tjetër të dokumentuar, të çdo zyrtari me kompetencë për të vendosur përfundimisht për aktin;
 - v) përfshirjen e çdo dokumenti paraprak, ndërmjetës dhe/ose shoqërues të një

- vendimmarrjeje për një akt ose kontratë që lidhet kryesisht me organizimin, të ardhurat, shpenzimet, strategjitë, burimet njerëzore, funksionet, detyrat e përgjegjësitë administrative pa praninë e të cilëve nuk do të vendosej dhe mbështetej përmbajtja përfundimtare e projektaktit ose projekt-kontratës në tërësinë e tyre;
- vi) çdo rast tjetër në përputhje me specifikat konkrete e përkatëse të misionit e të veprimtarisë së Universitetit të Mjekësisë, Tiranë.

Neni 7

Kompetenca thelbësore dhe përcaktuese për një akt

1. Një zyrtar i Universitetit të Mjekësisë, Tiranë, ka kompetencë thelbësore dhe përcaktuese për një akt, nëse pjesëmarrja, ndikimi dhe qëndrimi i tij në vendimmarrjen për këtë akt, sipas nenit 6 të kësaj rregulloreje, përcaktojnë përmbajtjen e aktit.
2. Si kompetencë thelbësore e përcaktuese e një zyrtari për një akt, përfshihet, në secilin nga çastet paraprake të mësipërme të vendimmarrjes, mundësia për të ndikuar mbi vendimmarrjen që buron nga:
 - a) roli urdhërues, propozues, këshillues, zbatues ose kontrollues i ushtruar, që rrjedh nga pjesëmarrja, ndikimi dhe qëndrimi në përgatitjen, negocimin, propozimin, këshillimin, miratimin, administrimin, kontrollin ose ekzekutimin e një akti apo kontrate;
 - b) zotërimi i informacionit, që lidhet kryesisht por jo vetëm me të dhëna sensitive për subjektet dhe ose ish-subjektet e Universitetit të Mjekësisë, Tiranë, për biznesin, të dhëna për tatimet e doganat, kuadrin rregullator, informacione sensitive personale, informacione për organet e hetimit e të ndjekjes, informacione për politikën ekonomike qeveritare dhe administrimin financiar;
 - c) çdo shkak tjetër në përputhje me specifikat konkrete e përkatëse të funksionit e të veprimtarisë së zyrtarëve të Universitetit të Mjekësisë, Tiranë.
3. Pavarësisht nga përcaktimet e pikave të mësipërme të kësaj rregulloreje, përbën çast paraprak të vendimmarrjes apo kompetencë thelbësore e përcaktuese për një akt ose kontratë, çdo rast i vlerësuar si i tillë nga Autoriteti Përgjegjës i Universitetit të Mjekësisë, Tiranë, i emëruar si i tillë nga Rektori i Universitetit të Mjekësisë, Tiranë.
4. Në secilin prej çasteve të mësipërme, zyrtari pjesëmarrës në vendimmarrje, me kompetencë thelbësore dhe përcaktuese, është i detyruar të deklarojë, në zbatim të pikës 1, të nenit 7, të ligjit nr.9367, datë 07.04.2005, i ndryshuar, nëse ka një interes privat që mund të shkaktojë rënien në konflikt interesi të çfarëdo lloji. Vetëdeklarimi bëhet nëpërmjet plotësimit të dokumentit tip për deklarime të këtij lloji.
5. Në të njëjtat raste, eprori ose institucioni epror mund t'i kërkojë zyrtarit të deklarojë rast pas rasti interesat privatë në zbatim të pikës 2, të nenit 7, të ligjit 9367 datë 07.04.2005, i ndryshuar.
6. Kur vlerësohet se ka rrezik për rënien në konflikt interesi të zyrtarit, veprohet sipas nenit 37 të ligjit nr. 9367, datë 07.04.2005, i ndryshuar.

Neni 8

Interesat privatë

1. Interesat privatë të një zyrtari janë ato interesat që parashikon neni 5 i ligjit nr. 9367, datë 07.04.2005, i ndryshuar, e konkretisht:



- a) të drejta dhe detyrime pasurore të çdo lloj natyre;
 - b) çdo marrëdhënie tjetër juridiko-civile;
 - c) dhurata, premtime, favore, trajtime preferenciale;
 - d) negocime të mundshme për punësim në të ardhmen nga ana e zyrtarit gjatë ushtrimit të funksionit apo negocime për çdo lloj forme tjetër marrëdhëniesh me interes privat për zyrtarin, pas lënies së detyrës, të kryer nga ai gjatë ushtrimit të detyrës;
 - e) angazhime në veprimtari private me qëllim fitimi ose çdo lloj veprimtarie, që krijon të ardhura, si dhe angazhime në organizata fitimprurëse dhe jofitimprurëse, sindikata ose organizata profesionale, politike, shtetërore dhe çdo organizatë tjetër;
 - f) marrëdhënie:
 - i. familjare apo të bashkëjetesës;
 - ii. të komunitetit;
 - iii. etnike;
 - iv. fetare;
 - v. të njohura të miqësisë ose të armiqësisë.
 - g) angazhime të mëparshme, nga të cilat kanë buruar ose burojnë interesa të përmendur në shkronjat e mësipërme të këtij neni.
2. Kufizimet e interesave privatë, të përcaktuara shprehimisht në ligjin nr. 9367, datë 07.04.2005, i ndryshuar, zbatohen së bashku me kufizimet e të njëjtit interes privat, të përcaktuara shprehimisht në një ligj tjetër, sipas parimit, që zbatohet ai kufizim që është më i rreptë.
 3. Nëse në ligjin nr. 9367, datë 07.04.2005, i ndryshuar, në lidhje me një interes të caktuar privat të një zyrtari, nuk është përcaktuar ndonjë kufi sasior i kufizimit të këtij interesi, ndërsa në një ligj tjetër i njëjti interes, me qëllim parandalimin e konfliktit të interesave, kufizohet shprehimisht sipas një kufiri sasior, atëherë ky kufizim zbatohet edhe për kriteret e përcaktuara në ligjin nr. 9367, datë 07.4.2005, i ndryshuar, dhe anasjellas.
 4. Vlerësohet shkak për lindjen e konfliktit të interesit, çdo lloj interesi privat i zyrtarit nga ata të përcaktuar në nenin 5 të ligjit nr.9367 datë 07.04.2005, i ndryshuar, çdo lidhje apo gërshetim ndërmjet dy a më shumë prej tyre, nëse për shkak të këtij interesi ose për shkak të daljes jashtë kufizimeve të detyrueshme të këtij interesi, shfaqet një gjendje me konflikt interesi, sipas përkufizimeve të pikave 1 e 4 të nenit 3 të ligjit të lartpërmendur.

KREU II

PROCEDURAT DHE MJETET PËR IDENTIFIKIMIN DHE REGJISTRIMIN E KONFLIKTEVE RAST PAS RASTI TË INTERESAVE

Seksioni 1

Identifikimi dhe regjistrimi i interesave në kushtet e konflikteve rast për rast të interesave

Neni 9

Deklarimi rast për rast i interesave privatë të zyrtarit

1. Çdo zyrtar, sipas përcaktimit të këtij termi në nenin 5 të kësaj rregulloreje, në ushtrimin e kompetencave ose në kryerjen e detyrave të tij funksionale ose të ngarkuara përkohësisht, në bazë të njohjes së tij dhe në mirëbesim, detyrohet të bëjë vetëdeklarim paraprak, rast për rast, të ekzistencës së interesit të tij privat, që mund të bëhet shkak për lindjen e konfliktit të interesit.
2. Deklarimi rast për rast i interesave privatë bëhet çdo herë kur kjo kërkohet nga eprori ose nga

institucioni epror

3. Deklarimi, si rregull duhet kërkuar dhe bërë paraprakisht. Kur kjo nuk është e mundur ose kur nuk ka ndodhur, deklarimi kërkohet dhe bëhet sa më shpejt të jetë e mundur.
4. Vetëdeklarimi ose deklarimi me kërkesë bëhet me shkrim, kur zyrtari ose punonjësi përfshihet në një vendimmarrje për një akt.

Neni 10

Identifikimi i interesave privatë të zyrtarit nga persona të tretë

1. Ofrimi i informacionit për interesat privatë të zyrtarit në Universitetin e Mjekësisë, Tiranë, është:
 - a) detyrë e çdo zyrtari që ka dijeni;
 - b) e drejtë e palëve të interesuara dhe e çdo personi, që ka dijeni dhe që ka një interes në përgjithësi e që përputhet me qëllimin e ligjit nr. 9367, datë 07.04.2005, i ndryshuar.
2. Burime të tjera informacioni për interesat privatë të një zyrtari të UMT-së, mund të jenë edhe ato burime të parashikuara në nenin 9 të ligjit nr. 9367, datë 07.04.2005.

Neni 11

Lëshimi i autorizimit nga zyrtari i Universitetit të Mjekësisë, Tiranë

1. Universiteti i Mjekësisë, Tiranë, vë në dispozicion të zyrtarëve të tij modelin e autorizimit, në formë e në përmbajtje, që ata duhet të lëshojnë, brenda 30 ditëve nga data e fillimit të marrëdhënieve të punës.
2. Autorizimi i plotësuar dorëzohet pranë Autoritetit Përgjegjës të UMT-së.

Neni 12

Autoritetet përgjegjëse për parandalimin, kontrollin dhe zgjidhjen e gjendjeve të konfliktit të interesave

1. Autoriteti qendror përgjegjës për parandalimin, kontrollin dhe zgjidhjen e gjendjeve të konfliktit të interesave është ILDKPKI-ja.
2. Autoriteti ose strukturat përgjegjëse për zbatimin e ligjit nr. 9367, datë 07.04.2005, sipas kësaj rregulloreje dhe hierarkisë në UMT janë:
 - a) rektori;
 - b) zëvendësrektorët;
 - c) administratori i UMT-së dhe administratorët e njësive kryesore të UMT-së;
 - d) drejtuesit e njësive kryesore;
 - e) drejtuesit e njësive bazë dhe shefat e shërbimeve;
 - f) drejtorët e drejtorive sipas strukturës;
 - g) përgjegjësit e sektorëve.
3. Autoriteti përgjegjës në Universitetin e Mjekësisë, Tiranë, i cili zbaton detyrat e përcaktuara në ligjin nr. 9367, datë 07.04.2005 dhe nenin 13 të kësaj rregulloreje përcaktohet me urdhër të rektorit të UMT-së.



Neni 13
Detyrat e Autoritetit Përgjegjës të Universitetit të Mjekësisë, Tiranë

1. Autoriteti Përgjegjës në UMT kryen detyrat e mëposhtme:
 - a) mbledh dhe dokumenton interesat privatë të zyrtarëve të Universitetit të Mjekësisë, Tiranë;
 - b) shpërndan dhe mbledh autorizimet e detyrueshme për t'u lëshuar nga zyrtarët e Universitetit të Mjekësisë, Tiranë, sipas nenit 10, të ligjit nr. 9367, datë 07.04.2005, i ndryshuar, dhe nenit 9 të kësaj rregulloreje;
 - c) krijon regjistrin përkatës dhe mban regjistrimet rast për rast të konfliktit të interesit;
 - d) bazuar në regjistrimin dhe vlerësimin e interesave privatë të zyrtarëve të të Universitetit të Mjekësisë, Tiranë, u sugjeron atyre dhe/ose eprorëve të tyre, çështjet dhe momentet kur zyrtarët, dhe/ose eprorët e tyre duhet të tregohen të kujdesshëm për parandalimin e:
 - i. konfliktit rast për rast të interesit (faktik, në dukje dhe të mundshëm);
 - ii. konfliktit të vazhdueshëm të interesit;
 - e) mbështet eprorin dhe zyrtarin në vlerësimin e kryerjes së padrejtë të detyrave për shkak të konfliktit të interesit, në marrjen e masave disiplinore apo në propozimin për vendosjen e gjobave në rast kundërvajtjesh administrative të zyrtarit, në kuptim të ligjit nr.9367, datë 07.04.2005, i ndryshuar;
 - f) përgatit guida, informon, këshillon e trajnon zyrtarët në lidhje me këtë ligj, me të drejtat e detyrimit e tyre dhe me parandalimin sa më të mirë të konfliktit të interesave;
 - g) mbështet rektorin dhe administratorin e UMT-së në kryerjen e deklarimit periodik të interesave;
 - h) njofton zyrtarët dhe punonjësit e të Universitetit të Mjekësisë, Tiranë për çdo këshillë apo udhëzim të ILDKPKI-së;
 - i) ndjek e zbaton detyra të tjera që i ngarkohen sipas kësaj rregulloreje.

Neni 14
Regjistri i konflikteve rast për rast të interesave

1. Për regjistrimet e konflikteve rast për rast të interesave të zyrtarëve në Universitetin e Mjekësisë, Tiranë, krijohet regjistri me të njëjtin emër.
2. Regjistri i konflikteve rast për rast të interesave administrohet nga Autoriteti Përgjegjës i Universitetit të Mjekësisë, Tiranë, dhe respekton formën tip të miratuar nga ILDKPKI-ja.

Neni 15
Regjistrimet rast për rast të konflikteve të interesit

Autoriteti Përgjegjës, për çdo rast të shfaqjes së një konflikti rast për rast të interesit, regjistron identitetin e zyrtarit të Universitetit të Mjekësisë, Tiranë, interesat privatë të tij, shkak për konflikt interesi, thelbin e konfliktit, palët e interesuara, burimin e të dhënave, mënyrën e marrjes dhe të verifikimit të tyre, si dhe vendimin që është marrë, mbështetur në këto të dhëna, përfshirë edhe vendimet e marra nga eprorët, institucionet eprore ose nga gjykatat.

Seksioni 2

Identifikimi, regjistrimi, kufizimi i interesave privatë dhe trajtimi i rasteve me konflikt interesi



Neni 16
Zyrtarët që mbartin detyrimin për deklarim periodik të interesave privatë

1. Deklarimi i interesave privatë periodikë të zyrtarëve të Universitetit të Mjekësisë, Tiranë, bëhet në përputhje me kërkesat e ligjit nr. 9367, datë 07.04.2005, i ndryshuar.
2. Zyrtarët e Universitetit të Mjekësisë, Tiranë, të cilët janë të detyruar të bëjnë deklarim të interesave privatë periodikë, janë:
 - a) rektori ;
 - b) administratori i UMT-së.
3. Në përputhje me nenin 7, pika 5 të ligjit nr. 9049, datë 10.04.2003, i ndryshuar, mbartin detyrim për deklarim të pasurive dhe detyrimeve financiare periodike edhe bashkëshorti/ja, bashkëjetuesi/ja dhe fëmijët madhorë të zyrtarëve të UMT-së, të përcaktuar në pikën 2 të këtij neni.
4. Çdo zyrtar i Universitetit të Mjekësisë, Tiranë, i përcaktuar në pikën 2 të këtij neni, në rast largimi nga funksioni dhe në rast se nuk është më subjekt i deklarimit të interesave privatë periodikë në ILDKPKI, ose kur kalon në një pozicion që nuk mbart detyrimin për deklarim, është i detyruar që, brenda 15 ditëve nga data e largimit nga funksioni, të plotësojë dokumentin zyrtar "Deklaratë pas largimit nga funksioni". Sektori i Burimeve Njerëzore dhe Sektori i Financës nuk mund të bëjnë dorëzimin e librezës së punës, të librezës së kontributeve shoqërore, të çdo dokumenti tjetër, si dhe pagimin e pagës së fundit dhe/ose shpërblimeve që mund t'i takojnë zyrtarit, në rast se ky i fundit nuk plotëson këtë detyrim ligjor.

Neni 17
Llojet e interesave privatë që deklarohen periodikisht

1. Interesat privatë, që deklarohen periodikisht, janë të përcaktuar në nenin 4 të ligjit nr. 9049, datë 10.04.2003, i ndryshuar .
2. Subjektet e përcaktuara detyrohen të deklarojnë në Inspektoratin e Lartë të Deklarimit dhe Kontrollit të Pasurive dhe Konfliktit të Interesave brenda datës 31 mars të çdo viti, gjenden deri më 31 dhjetor të vitit paraardhës të interesave privatë, burimet e krijimit të tyre, si dhe të detyrimeve financiare.

Neni 18
Prania dhe kufizimi i interesave privatë të personave të lidhur me zyrtarin

1. Persona të lidhur me zyrtarin e Universitetit të Mjekësisë, Tiranë, për kufizimet e interesave privatë të zyrtarëve, të përcaktuar në nenet 16 e 17 të kësaj rregulloreje, janë përkatësisht:
 - a) bashkëshorti/ja, bashkëjetuesi/ja, fëmijët në moshë madhore, prindërit e zyrtarit e të bashkëshortit/es, bashkëjetuesit/es;
 - b) çdo person fizik ose juridik, i cili, në lidhje me dhuratën, favorin, premtimin ose trajtimin preferencial, luan rolin e ndërmjetësit a të shkëmbyesit të interesave të lindur nga ky veprim.
2. Ndalimet dhe kufizimet për zyrtarin e Universitetit të Mjekësisë, Tiranë, të përcaktuara në këtë rregullore, zbatohen edhe për personat e lidhur me të, në përputhje me pikën 1 të këtij neni.
3. Përsa i përket kufijve të zotërimit të aksioneve ose të pjesëve në kapital, për zyrtarin e Universitetit të Mjekësisë, Tiranë, dhe personin e lidhur me të, zbatohen drejtëpërdrejt



parashikimet e nenit 24, pikat 4 e 5, si dhe nenit 35, pikat 2 e 3, të ligjit nr.9367, datë 07.04.2005, i ndryshuar.

Neni 19

Ndalimi i marrjes së dhuratave, favoreve, premtimeve ose trajtimeve preferenciale

1. Është e ndaluar që një zyrtar i Universitetit të Mjekësisë, Tiranë, të kërkojë, të pranojë ose të marrë, në mënyrë të drejtpërdrejtë a të tërthortë, për veten, për familjen, të afërmit, dhurata, favore, premtime ose trajtime preferenciale, të cilat i jepen për shkak të pozicionit të tij në në Universitetin e Mjekësisë, Tiranë, nga një individ, person fizik ose juridik privat, kur kjo mund të shkaktojë lindjen e një konflikti interesi të çdo lloji, ose që ndikon ose duket sikur ndikon në paanshmërinë e kryerjes së detyrës a është ose duket sikur është shpërblim për mënyrën e kryerjes së detyrës zyrtare.
 - a) “Dhurata”, sipas kësaj rregulloreje ka të njëjtin kuptim të përcaktuar në ligjin nr.9367, datë 07.04.2005, i ndryshuar, dhe VKM-në nr.714, datë 22.10.2004.
 - b) Nuk konsiderohen si dhurata, në kuptim të këtij neni, dhuratat, të cilat i ofrohen zyrtarit si pasojë e lidhjeve farefisnore apo njohjeve personale që ai ka me dhuruesit, si edhe në rastin kur është e qartë se dhurata nuk ka asnjë lidhje me pozicionin dhe cilësinë si nëpunës i administratës publike, të personit, që merr dhuratën.
2. Zyrtari nuk duhet që, në mënyrë të drejtpërdrejtë ose të tërthortë, të japë dhurata ose të ndërmjetësojë për të dhënë dhurata për një zyrtar të një niveli më të lartë apo të afërm të tij dhe as të kërkojë ose të pranojë dhurata nga zyrtarë të një niveli më të ulët ose të afërm të tij, për shkak të cilësive dhe raporteve zyrtare.
3. Rregullat e mësipërme nuk zbatohen në rastin e ftesave të zakonshme apo kur janë të ftuar punonjës ose kolegë të tjerë, të mikpritjes tradicionale, dhuratave me vlerë simbolike apo tradicionale dhe të mirësjelljes, brenda kufijve normalë të traditës, zakoneve dhe praktikës së përditshme, të cilat nuk krijojnë dyshime për paanësinë e nëpunësit.
4. Vlerësmi dhe trajtimi i dhuratave bëhet sipas rregullave të përcaktuara në nenin 23 të ligjit nr. 9367, datë 07.04.2005, i ndryshuar, dhe në VKM-në nr.714, datë 22.10.2004.
5. Në asnjë rast zyrtari i Universitetit të Mjekësisë, Tiranë, nuk duhet të pranojë dhurata në vlerë monetare.
6. Përjashtohen vetëm rastet e përcaktuara me akte të organeve kompetente, të cilat lejojnë pranimin e dhuratave apo trajtimeve preferenciale për arsye protokollare.

Neni 20

Mënyrat e trajtimit dhe të zgjidhjes së konfliktit të interesave

1. Mënyrat e trajtimit dhe të zgjidhjes së konfliktit të interesave për zyrtarët/punonjësit e Universitetit të Mjekësisë, Tiranë, bëhen sipas kreut IV të ligjit nr. 9367, datë 07.04.2005, i ndryshuar.
2. Disa nga mënyrat bazë të mënjanimit të konflikti të interesave janë:
 - a) t’i kufizohen zyrtarit informacione të caktuara, që lidhen me ushtrimin e funksionit të tij;
 - b) të mos ngarkohen me detyra që mund të çojnë në shfaqjen e konfliktit të interesave;
 - c) të mos lejohet zyrtari të marrë pjesë në procesin e vendimarrjes;
 - d) të rishikohen ose të ndryshohen detyrat dhe kompetencat e zyrtarit;
 - e) të transferohet zyrtari në një detyrë tjetër, që shmang konfliktin e interesave;
 - f) të merren masat e nevojshme për të shmangur emërimin ose zgjedhjen e një zyrtari në

- funksiione, në të cilat mund të lindin ose ka konflikte interesash;
- g) në rast të një akti të marrë në praninë e konfliktit faktit të interesit, në çdo mënyrë që kjo vihet re, të anulohen ose të revokohen, aktet e marra nga zyrtari, sa më parë që të jetë e mundur, dhe mundësisht para se ato të kenë sjellë pasoja;
 - h) anulimi ose revokimi i aktit mund të bëhet dhe kur gjykohet se akti është marrë në kushtet e konfliktit në dukje të interesit, i cili mund të shfaqet rast për rast ose në mënyrë të vazhdueshme;
 - i) anulimi ose revokimi i një akti nuk bëhet nga eprori i zyrtarit, kur ai vlerëson se pasojat që mund të vijnë nga anulimi ose revokimi i tejkalojnë dukshëm përfitimet nga ky anulim ose revokim.

Neni 20 **Sanksionet**

Shkeljet e detyrimeve të përcaktuara në ligjin nr. 9367, datëm 07.04.2005, dhe në ligjin nr. 9049, datë 10.04.2003, përbëjnë sipas rastit shkelje disiplinore, kundërvajtje administrative apo veprë penale, dhe ndëshkohen sipas parashikimeve ligjore në fuqi.

Neni 21 **Mbrojtja për dhënien e informacioneve**

1. Çdo shtetas, i cili ofron informacion të bazuar për rastet e konfliktit të interesave të padeklaruar nga zyrtarët e Universitetit të Mjekësisë, Tiranë, përfiton mbrojtje të veçantë administrative, si më poshtë:
 - a) zyrtari i Universitetit të Mjekësisë, Tiranë, për të cilin jepet informacion, nuk mund të ushtrojë asnjë kompetencë administrative me efekte ndëshkuese mbi shtetasin informues (qoftë ky dhe subjekt i UMT-së), dhe as të bëhet pengesë për fitimin e të drejtave të ligjshme nga ky i fundit për shkak të dhënies së informacionit;
 - b) kur marrja e masës ndaj shtetasit që informon përcaktohet nga një shkak tjetër ligjor, ajo merret vetëm nga një zyrtar tjetër i UMT-së, që qëndron në marrëdhënie varësie vertikale mbi zyrtarin, për të cilin është dhënë informacioni.
2. Nga parashikimi i pikës 1, germa b, të këtij neni bën përjashtim rasti kur marrja e masës administrative bëhet në kushtet kur konflikti i vetëm i interesit, i pashmangshëm, i zyrtarit të UMT-së është ai në dukje kur plotësohen kushtet e mëposhtme:
 - a) kur zyrtari i Universitetit të Mjekësisë, Tiranë:
 - i. ose është i pazëvendësueshëm në ushtrimin e funksioneve;
 - ii. ose vetëpërjashtimi i tij është i pamundur, sepse është i pamundur delegimi i kompetencave të zyrtarit tek një zyrtar tjetër, për shkak të ligjit apo për shkak të situatës;
 - iii. ose për shkak se asnjëra nga zgjidhjet e parashikuara në nenin 24, pika 2 të kësaj rregulloreje nuk është e mundur;
 - b) dhe kur:
 - i. vendimet e zyrtarit të UMT-së, sipas rregullimeve me ligj, nuk i nënshtrohen miratimit, revokimit ose shfuqizimit nga një institucion epror;
 - ii. nuk është i mundur as transferimi a tjetërsimi i interesit privat, për shkak të natyrës së tij (si lidhje familjare, komunitare etj.);
 - iii. nuk ka kuptim, që për një rast konflikti të tillë, zyrtari i UMT-së të japë detyrimisht dorëheqjen nga funksioni. Në një rast të tillë, vendimet e këtij zyrtari i nënshtrohen një kontrolli dhe vlerësimi të veçantë nga eprori ose institucioni epror, të ngarkuar me ligj për të kryer kontrollin e këtyre vendimeve. Vendimi dhe rezultatet e kontrollit bëhen publike.



Neni 22
Ndalimi i shpërdorimit të së drejtës

1. Asnjëra nga dispozitat e kësaj rregulloreje nuk mund të interpretohet sikur i jep zyrtarëve të Universitetit të Mjekësisë, Tiranë, të drejta që të ndërmarrin ndonjë veprimtari ose të kryejnë ndonjë akt që synon cënimin e parashikimeve dhe rregullave të përcaktuara në ligjin nr.9367, datë 07.04.2005, i ndryshuar, ligjin nr. 9049, datë 10.04.2003, në këtë rregullore dhe në aktet e posaçme që rregullojnë veprimtarinë e Universitetit të Mjekësisë, Tiranë.
2. Në çdo rast që specifikimet në këtë rregullore bien ndesh me dispozitat e përcaktuara në ligjin nr. 9367, datë 07.04.2005, i ndryshuar, ligjin nr. 9049, datë 10.04.2003, i ndryshuar, dhe aktet nënligjore në zbatim të tyre, këto të fundit kanë prioritet dhe zbatohen drejtpërdrejt. Gjithashtu, në mungesë të parashikimeve të veçanta në këtë rregullore, zbatohen drejtpërdrejt dispozitat e këtyre ligjeve e akteve nënligjore.

Neni 23
Hyrja në fuqi

1. Kjo rregullore hyn në fuqi pas miratimit nga Senati Akademik i Universitetit të Mjekësisë, Tiranë.

KRYETARI I SENATIT AKADEMIK
ARBEN GJATA

